

Aruba Antaño

Ningun interes pa Aruba

ORANJESTAD (AAN): Un tiki mas di Aruba di antes.

"Ni Ovando ni e Reynan tabata di berdad interesa den e bienestar di e indiannan, ni esnan di Española ni esnan di Aruba y e otro islanan di Caribe.

E cuestion di "Evangelizazion" y "Cristianizazion" di e indigenanan (converti e indiannan di salvaje pa Cristiano) utilizando cualke metodo tabata un pretexto pa esclaviza nan y pone nan produci pa e caha di Corona Späño.

Fray Bartolome de Las Casas, kende a yega Española hunto cu Ovando, a laga relacionan historico tocante e tema.

Ni e islanan grandi den Caribe, ni e teritorionan situa na Tierra Firme, ni e islanan chikito manera Aruba, Bonaire y Curacao a ricibi algun beneficio di e prome Gobernadornan.

Den e bintiocho capitulonnan

di nan Instruccionnan tocante e indiannan, e Reynan a insisti superficialmente pa trata e indiannan bon, duna nan cas pa nan biba cu nan muher y yiunan, con tal cu nan ser doctrina den religion Catolico.

Un di e propositonan "scondi" di e instruccionnan tabata pa obliga e indiannan, di e manera ey, pa paga belasting, tributo y diezmonan mescos cu e otro subditanan di e Reynan, y pone nan tambe di biaha na disposicion exclusivo di e Reynan pa recoge oro pa nan y ehecuta labranzanan di campo pa nan.

Kitando nan di e posicion di esclavo di e Spañonan, na kendenan nan a ser entrega den e doctrina di "Repartimiento", nan a pasa bira propiedad productor exclusivo di Corona.

Pero, ademas di factornan "scondi" tras di e Instruccionnan, e Reynan a manda otro instruccionnan (conoci como "Instruccionnan Secreto")



exclusivamente pa Gobernador Ovando, y nan ta cuminsa cu " ... esaki ta pa abo (Ovando) so lesa y ningun otro persona, riba e siguiente

cosnan : percura pa algun di e poblacionnan di indiannan ta cerca di e minanan na unda tin oro, pa asina nan por recoge mas (pa nos, e Reynan) ... "

O sea cu e idea tras di e instruccionnan tabata pa crea pueblonan cerca di e mi-

nanan, pa eynan e indiannan ser hiba di nan propio boluntad cerca di unda tabata tin oro pa aumenta e caha di Corona.

Pero, Ovando tabata sa cu e Spañonan no tabata bay acepta pacificamente pa nan kita e indiannan for di nan, pesey e no a ehecuta e plan tal manera cu e tabata ta.

Poco, poco el a cuminza libera e indiannan, pero asina cu esakinan a haya nan mes liber, nan a huy bay mondi, evitando contacto cu e Spañonan y despreciando e salario cu nan tabata bay ricibi pa nan trabao.

Ovando a opta di biaha pa skirbi e Reynan y pone nan na altura di e situacion, spliando nan cu e indiannan a bira vagabundo y cu nan no por a ser adoctrina, y cu pesey mes, e Spañonan no tabata tin hende "pa traha nan teranan y juda nan saca oro".

(For di e buki : HISTORIA DI ARUBA) (Skirbi pa e : Escritor y Historiador Sr. Jossy M. Mansur)